

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 400011 21 St
Tuzla, 07.07.2025.godine

Općinski sud u Tuzli, sudija Antonela Đaković, kao stečajni sudija u stečajnom postupku nad imovinom dužnika "CPM BH" d.o.o. za građevinarstvo i poslovni inženjering Lukavac u stečaju, ul. Partizanski put bb, donio je sljedeće,

RJEŠENJE

ZAKLJUČUJE SE stečajni postupak nad imovinom dužnika "CPM BH" d.o.o. za građevinarstvo i poslovni inženjering Lukavac u stečaju, zbog nedovoljnosti stečajne mase.

Rješenje o zaključenju stečajnog postupka objavit će se u "Službenim novinama FBiH" i na oglasnoj ploči ovog suda.

Po pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Tuzli, radi brisanja stečajnog dužnika iz sudskog registra.

Obavještavaju se stečajni dužnik i stečajni upravnik da pravne posljedice zaključenja stečajnog postupka nastupaju 8 dana od dana objavljivanja ovog rješenja u „Službenim novinama FBiH“.

Obrazloženje

Rješenjem ovog suda, broj gornji, od 28.09.2021.godine otvoren je stečajni postupak nad imovinom dužnika "CPM BH" d.o.o. za građevinarstvo i poslovni inženjering Lukavac u stečaju.

U toku stečajnog postupka održana su dva ispitna ročišta na kome su ispitane prijave potraživanja kao i naknadne prijave, a ukupno prijavljena potraživanja iznose 21.952.359,37 KM od kog iznosa je osporeno 29.880,75 KM, a priznato kao razlučno pravo 19.759.269,13 KM. Ukupno priznata potraživanja stečajne mase iznose 2.163.209,49 KM, od čega je u viši isplatni red priznato 66.191,10 KM, opći isplatni red 2.086.090,19 KM i niži isplatni red 10.928,20 KM.

Prva prodaja imovine stečajnog dužnika održana je 15.02.2022.godine kom prilikom je prodana zgrada Hotela Lukavac (poslovna zgrada), i izvršeno djelimično namirenje razlučnih povjerilaca, dok je drugu prodaju imovine realizovala NLB Banka d.d kroz izvršni postupak i doznala iznos od 10 % na ime troškova stečajne mase čime je unovčena sva imovina stečajnog dužnika, a razlučna prava su namirena u procentu 5,69 %. Nakon unovčenja imovine izvršena je dioba višeg isplatnog reda i isti je namiren u procentu 40,2 %.

Pored unovčene imovine, stečajni dužnik je imao i potraživanja prema trećim licima po osnovu zakupnina a prema Odluci Skupštine povjerilaca vođen je i sudski postupak koji je okončan presudom Općinskog suda u Tuzli broj: 32 0 Ps 415942 21 Ps od 31.03.2023.godine kojom se u cijelosti usvaja tužbeni zahtjev tužitelja – stečajnog dužnika (isplata zakupnina za Hotel Lukavac u iznosu od 172.500,00 KM protiv GTI BH d.o.o Lukavac) , koja je potvrđena presudom Kantonalnog suda u Tuzli broj : 32 0 Ps 415942 23 Pž od 29.08.2024.godine. Radi pokretanja izvršnog postupka po osnovu navedene presude stečajni upravnik je izvršio provjeru stanja imovine tuženog te utvrdio da tuženi nema imovine (blokirani račun, nije upisan kao posjednik u katastarskom operatu, vlasnik/ suvlasnik nekretnina na području Grada Lukavac, a od imovine posjeduje pokretne stvari – automobile koje nisu

pronađene, objavljena prije više godina, a pokretanje izvršnog postupka bi dalje moglo izazvati određene troškove.

Iz izvještaja stečajnog upravnika od 19.06.2025.godine je utvrđeno da dužnik ne raspolaže imovinom koja bi predstavljala stečajnu masu, a troškovi stečajnog postupka su pokriveni uplaćenim predujmom od strane predlagača kao i iznosa od prodaje dijela imovine u izvršnom postupku 126 0 Ip 062400 13 Ip pred Općinskom sudom u Lukavcu.

Na osnovu odredbe člana 197. Zakona o stečaju FBiH, stečajni upravnik je, imajući u vidu da nema stečajne mase iz koje bi se namirila bar djelimično prijavljena i priznata potraživanja, dana 30.05.2025.godine prijavio nedovoljnost stečajne mase.

Sud je rješenjem od 02.06.2025.godine, a koje je objavljeno u "Službenim novinama FBiH" broj: 44/25 od 13.06.2025.godine, javno objavio prijavu nedovoljnosti stečajne mase, a na osnovu odredbe člana 197. stav 3. Zakona o stečaju FBiH (Službene novine broj: 53/2021). Stečajni upravnik je 19.06.2025.godine dostavio završni Izvještaj za stečajnog dužnika "CPM BH" d.o.o. za građevinarstvo i poslovni inženjering Lukavac u stečaju, sa rekapitulacijom odnosno analitičkim pregledom troškova po godinama kako je to precizirano u navedenom Izvještaju.

Odredbom člana 200. stav 1. Zakona o stečaju propisano je da stečajni sudija zaključuje stečajni postupak čim je stečajni upravnik izvršio diobu stečajne mase, u skladu sa članom 198. ovog zakona, a stavom 2. istog člana je propisano da je stečajni upravnik dužan za svoj rad, nakon prijavljivanja nedovoljnosti stečajne mase, posebno da položi račun stečajnom sudiji. Pored navedenog odredbom člana 200. stav 3. istog Zakona propisano je da ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija će na prijedlog stečajnog upravnika, povjerioca stečajne mase ili po službenoj dužnosti odrediti naknadnu diobu. U ovom slučaju se na odgovarajući način primjenjuju odredbe člana 192. stav 3, i člana 193. i 194. ovog Zakona.

Obzirom da stečajni dužnik nema imovine čijim bi se unovčavanjem namirila potraživanja povjerilaca, osim za pokriće troškova stečajnog postupka, to je sud shodno odredbi člana 200. Zakona o stečaju zaključio stečajni postupak i odlučio kao u izreci rješenja.

Prema odredbi člana 204. stav 1. Zakona o stečaju (Službene novine FBiH broj: 53/2021) rješenje o zaključenju stečajnog postupka objavljuje se u „Službenim novinama FBiH“, web stranici Općinskog suda u Tuzli i oglasnoj tabli suda.

Pravne posljedice zaključenja stečajnog postupka nastupaju 8 dana nakon objavljivanja rješenja u „Službenim novinama FBiH“, a sve shodno članu 204. stav 3. Zakona o stečaju FBiH.

Odluka o brisanju pravnog lica iz javnih registara zasnovana je na odredbi člana 204. stav 5. Zakona o stečaju FBiH.

**Stečajni sudija,
Antonela Đaković**

POUKA: Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 (osam) dana, od dana objave rješenja u „Službenim novinama FBiH“.